



KENYATAAN MEDIA
SITUASI TERKINI JANGKITAN COVID-19
DI NEGARA BRUNEI DARUSSALAM

08 April 2020

1. Alhamdulillah, dan dengan izin Allah Subhanahu Wa Ta'ala jua, Kementerian Kesihatan ingin memaklumkan bahawa pada hari ini, Rabu, 14 Syaaban 1441 bersamaan 08 April 2020, **tidak ada kes baru** yang disahkan dijangkiti COVID-19 di negara ini. Oleh yang demikian, jumlah keseluruhan kes COVID-19 di Negara Brunei Darussalam kekal sebanyak **135 kes**.
2. Sementara itu, sebanyak **6 lagi kes** yang dirawat di Pusat Pengasingan Kebangsaan telah disahkan sembuh dan dibenarkan untuk pulang ke rumah, membawa **jumlah keseluruhan yang telah sembuh kepada 91 orang**.
3. Pada ketika ini, terdapat 43 kes yang masih dirawat di Pusat Pengasingan Kebangsaan di mana 2 orang masih dalam keadaan kritikal dan kedua-duanya memerlukan bantuan mesin tambahan *heart/lung machine (ECMO)* di samping bantuan mesin pernafasan manakala selebihnya adalah dalam keadaan yang baik.
4. Pada hari ini juga, jumlah keseluruhan mereka yang telah menamatkan tempoh kurantin menurut Akta Penyakit Berjangkit Penggal 204 ialah

sebanyak **2,281 orang** dan hanya **94 orang** sahaja yang masih menjalani kurantin. Sementara itu, dalam tempoh 24 jam yang lalu, sebanyak 203 sampel telah diuji bagi virus SARS-CoV-2 yang membawa jumlah keseluruhan ujian makmal dijalankan sejak Januari 2020 kepada 8,648 ujian.

5. Walaupun hari ini adalah merupakan hari keempat di mana Negara Brunei Darussalam tidak melaporkan sebarang kes baru COVID-19, Kementerian Kesihatan ingin mengingatkan kepada orang ramai untuk terus menerus melaksanakan tanggungjawab sosial masing-masing dan membudayakan langkah-langkah pencegahan, khususnya dengan melakukan amalan kebersihan diri dan persekitaran pada setiap masa. Orang ramai adalah juga sekali lagi diingatkan untuk sentiasa mengamalkan penjarakkan sosial (*social distancing*) dan mematuhi larangan perkumpulan ramai (*mass gathering*) yang ada pada masa sekarang yang mana telah dikeluarkan di bawah Akta Penyakit Berjangkit Penggal 204.

6. Kesemua langkah-langkah yang sedang dilaksanakan ini adalah semata-mata untuk memastikan wabak COVID-19 dapat terus dikawal di samping untuk memastikan keselamatan dan kesejahteraan rakyat dan penduduk di negara ini. Kita semua mahukan keadaan pulih seperti biasa dengan secepat mungkin namun ia akan sukar dicapai tanpa adanya kerjasama yang padu dari semua pihak, dari pelbagai lapisan masyarakat, tanpa mengira latar belakang atau umur. Negara kita masih berada di bawah ancaman kemasukan virus ini dari luar negara.

7. Di kesempatan ini juga, sempena sambutan hari kesihatan sedunia baru-baru ini yang membawa tema '**Beri Sokongan Kepada Para Jururawat dan Bidan (Support Nurses and Midwives)**', saya ingin merakamkan ucapan setinggi-tinggi penghargaan kepada semua para profesional jururawat dan bidan di Negara Brunei Darussalam yang telah banyak memberikan khidmat penjagaan dan perlindungan kesihatan kepada setiap lapisan masyarakat. Terutama sekali, pada masa ini ketika negara kita dilanda musibah wabak COVID-19 yang mana para jururawat dan bidan adalah merupakan di antara barisan hadapan (*frontliners*) yang banyak mengorbankan masa dan tenaga serta rela berhadapan dengan dengan risiko dan bahaya demi untuk menjaga dan merawat pesakit-pesakit. Namun begitu, para jururawat sentiasa memberikan komitmen yang tinggi termasuklah dalam memberikan rawatan dan penjagaan pesakit yang berkualiti tinggi. Tidak dapat dinafikan lagi, profesion kejururawatan dan kebidanan ini adalah satu profesion yang terpuji. Oleh yang demikian, diharap lebih ramai lagi belia-belia akan dapat mencontohi dan memilih serta menceburi bidang kejururawatan dan perbidanan yang mulia ini. Marilah kita bersama-sama memberikan sokongan kepada para jururawat dan bidan, dan terus mendoakan semoga Allah Subhanahu Wa Ta'ala membalas budi baik serta sentiasa melimpahkan rahmatnya kepada para profesional jururawat dan bidan di Negara Brunei Darussalam. Aamiin Aamiin Ya rabbal Aalamiin.

8. Untuk maklumat lanjut dan perkembangan terkini, orang ramai boleh melayari laman web Kementerian Kesihatan iaitu **www.moh.gov.bn** atau menghubungi

Talian Nasihat Kesihatan 148 (pada bila-bila masa) atau melalui aplikasi **healthinfo.gov.bn**.

- **TAMAT** -

Rujukan : KK/PR/2

Tarikh : 14 Syaaban 1441H / 08 April 2020